

半塘定稟

半塘填詞定彙敘目

卷一

乙彙 裏墨集令慢七首 蟲秋集令慢六首

丙彙 味梨集令慢二十二首

丁彙 鷺翁集令慢十九首

戊彙 蝟知集令慢十六首

卷二

己彙 校夢龕集令慢二十四首

庚彙 庚子秋詞令十七首 春蛩吟慢十

三首

辛彙南潛集令慢十五首

凡二卷七彙九集一百三十有九首
半塘詞嘗刻於京師爲丙丁戊三集今刻於
廣州者乃君哀其前後七彙刪汰幾半僅存
百許首自定本也予校讎旣竣而序之曰同
在人海之中相遭而爲友相友而又相知而
忽焉以逝者莫不以爲人事之至悲況乎夙
以文字相切劘其歷患難及其別離商訂舊
業言笑若親而甫接其書遽聞其死者此予

所由摧傷感歎而不能自己也始予在汴梁
納交君相得也已而從學爲詞愈益親及庚
子之變歐聯隊入京城居人或驚散予與同
年劉君伯崇就君以居三人者痛世運之凌
夷患氣之非一日致則發憤叫呼相對太息
旣不得他往乃約爲詞課拈題刻燭於喁唱
酬日爲之無閒一藝成賞奇攻瑕不隱不阿
談諧閒作心神灑然若忘其在顛沛兀艱中
而以爲友朋文字之至樂也比年君客揚州
予來粵東蹤迹乖阻書問時月相往還每有

所作必以寄示子謂君詞於回腸蕩氣中仍
不掩其獨往獨來之概君乃大以爲知言今
年春郵寄小象屬摹卷端謂令人他日得見
此老鬚眉其風趣如此方冀易一二歲予解
組北去從君襄羊山水閒各出所作相質證
此樂正未有艾未幾而君訃至矣悲夫悲夫
君天性和易而多憂戚若別有不堪者旣任
京秩久而得御史抗疏言事直聲震內外然
卒以不得志去位其遇厄窮其才未竟厥施
故鬱伊不聊之概一於詞陶寫之君詞導源

碧山復歷稼軒夢窗以還清真之渾化與周
止庵氏說契若鍼芥其必名於後固無俟予
之贅言而零縑遺墨燦然如新逝者不可復
作抑將何以爲懷耶他日伯崇見是編其感
喟又當何如耶歸安朱祖謀

頃年老僕自謫所歸寓家羊石於是老友古
微侍郎督學來此蓋自京師別去且十年不
翅矣一昨甫相見侍郎則驟語僕曰給諫王
幼霞今客死蘇州幸得其遺詞皆手定將爲
之刊印以行僕聞之驚悲與侍郎同心哀之

遂請其集以歸閱焉皆曩昔臺閣餘暇時朋
舊文酒宴集搭拍應副若不越乎流連光景
之情文其爲僕所親見吮毫伸紙者泰半也
今再讀其遺詞幼眇而沈鬱義隱而指遠膈
臆而若有不可於名言蓋斯人胸中別有事
在而犖然不能行其志也與僕同脫幼霞能
稍濡忍事或未可知乃決然侘傺以去甯流
落至死一瞑而不視豈謂非慷慨扼腕獨立
不屑之士也歟僕今旣老醜閒廢幼霞復彫
喪人閒世尙何者堪把玩留戀況浮漚文字

之閒乎乃吾侍郎獨不閒故舊死生之故爲
幼霞謀遺集之傳而絲邈乎其情僕爲之悵
焉動一念矣侍郎曰日吾且開雕然則非君
序之不可於是乎言之而益增吾悲光緒甲
辰冬十月南甯鍾德祥

半塘僧鷲小象



贊曰

不死於
於
於
於
於
於
於
於

慝之口
憎
驚
何
率
歸
以

止首
達
不
得
志
窮
無
以

自存
又
甚
哉
深
落
而
來

偶於
齟齬
吳其
嚴冷之

氣不
可博
而章
疏又不

欲於
自博
勵以
生平勛

奢所
謂長
短句者
遙託

諸特
郎之
表友
大運有

限傳春為壽謂僧驚好
名侍郎曰盃
乙巳藥南甯鍾德祥識

半塘定稟卷一

臨桂王鵬運佑題

東墨集

丙戌至己丑

掃花游 豐臺菊花零落同槐廬粹父泥

飲叢祠倚此索和

彎環十八是丹鳳城西。賣花邨路。舊游憶否。
又蒼煙偷換。穠春歌舞。好約來遲。一片秋聲
在樹。自凝佇。歎著意訪秋。秋轉無據。釀酒

重弔古。記往日詞人。醉香深塢。遠山翠縷。尙
依稀認得。那人眉嫵。倦倚西風。誤卻紅牙舊

譜。喚歸去。聽叢祠暮天鐘鼓。毛西河姬人曼殊豐臺張氏女也。

摸魚子 蕊軒前輩閱近作拜新月詞有

句云釣竿百尺綴珊瑚不羨麒麟閣上圖欲取鰲魚斫作膾間

君何處覓屠沽蓋隳括詞中語也倚此奉畬

鎮無聊一尊相屬罪言君試聽取管城食肉都無相妄意鳳脩麟脯君且住問鯖台侯家勝得齋鹽否書空自語歎臣朔常飢將軍負

腹奇氣向誰吐。麟閣上往事不堪細數。算
來圖畫難據。高平博陸皆人傑。屬國爾來何
許。休起舞。便燕頤權奇無覓侯封處。歌予和
汝。縱掣得金鰲。鳧髦未掃。莫慰此情苦。

滿庭芳芳篝燈夜坐忽聞清歌墜惟恨觸

渺兮予懷也

風露高寒。蛩螢怨抑。夜闌人倚燈篝。暗塵驚
落。何處發清謳。已是潘郎老去。青衫在鬢減
花羞。十年恨無端。棖觸腸斷舊風流。風流
彈指處。畫中人遠。夢裏春柔。料記曲當時。紅

豆還留倩取窺簾淡月悲懽事一例全句霜
華重丁丁漏水銀箭咽潛虬

秋宵吟霧雨釀寒秋光向盡和鶴公

冷雲低敗葉委又到秋光婪尾東園畔記醉
綠酬紅餞春曾幾思纏緜意旖旎撩亂愁絲
難理西風悄又霧雨冥迷釀寒如此賴有
黃花共晚節傲霜未已故人書斷海客談空
何物令公喜安得滄江裏一葉凌波深入萬
葦派空明弄笛船唇歌闕明月正在水

金縷曲霜露既至雲物皆秋獨絃哀歌

用抒子懷詞成以示巢隱曰此

秋聲也爲之擊節

寂寞閒門閉。又天涯、歲華如此。旅懷孤寄。姹
燕嬌鶯前日事。依舊空階絡緯。更著甚、管絃
清脆。薜荔叢深。狡獪嘯。料靈均應恨。歌山鬼。
還禁得、幾憔悴。海山煙樹蒼茫裏。自成連
刺船歸後。果移情未。白眼看天星與月。但見
樓臺彈指。問高處、闌干誰倚。漫遣鈿箏移玉
柱。鑄相思、枉費黃金淚。聽嘹亮、鴈聲起。

青山濕徧。八月三日譙君生朝也。歲月

不居人琴俱往。納蘭容若往
製此調音節淒惋。金梁外史
龍壁山人皆擬之。傷心人同。

此灑拋矣。

中秋近也。年時棖觸。雙笑行觴。記得木樨香
裏。倚青匳。特換明妝。更喁喁。吉語祝蘭房。願
年年花好人同健。醉花陰。不羨鴛鴦。誰信皋
橋賃。庶飄零天壤。王郎。任是他生能卜也。
難禁得。此際神傷。二十三年斷夢。霜侵鬢。誰
念無腸。看依然兒女拜成行。只不堪。衰草殘

陽外。醉棠梨。淚血沾裳。明月無端。弓勢宵來
空照流黃。

臨江仙 己丑除夕

爆竹聲中催改歲。年年此夕。殊鄉。天涯兄弟
各相望。幾時歸去。談笑醉春觴。已是向平
昏嫁了。名山願好。誰償。休從鏡聽卜行藏。春
花秋月。流轉任風光。

蟲秋集

庚寅至癸巳

太常引

畫闌秋氣與雲平。病起怯衣輕。吟思底。淒清。

聽依約蛩聲。鴈聲。甯馨老子，十圍便腹，空
洞儘容卿。青眼幾時橫。看山色新來瘦生。

卜算子

盼到月輪圓。夜夜期三五。誰信清光欲滿時，
偏被纖雲妒。七十二鴛鴦，交頸花間住。誰
信成雙作對飛，賸遣孤鸞舞。

長亭怨慢 寒夜飲水芝支館用壁上龍

壁山人詞韻索省旃和

漫商略愁長宵短。滿目風塵，素襟誰浣。歲晚
冰霜，中年絲竹，意何限。願花長好，爭信我風

懷減許事不須知。看月與清尊俱滿。依黯。
認酒痕猶是。早是酒人星散。清寒對影。漫贏得笑人蘭畹。儘依依照座銀荷也。羞對年時心眼。倩簾幙橫枝。長笛夜寒相伴。

采桑子

闌干象曲閒凝佇。日影東廊。月影西廊。一霎寒溫值底忙。小園貯得春多少。花要生香。葉要生香。那禁東風柳絮狂。

水龍吟平生嗜睡成癖。讀天籟集睡詞。

深有契於予懷者。戲用原韻以

誌賞心

舉頭十丈塵飛，人間何許埋愁地。頽然一笑，
玉山自倒，春生夢寐。我已相忘，蕉陰覆鹿，槐
根封蟻。歎無情世故，倉皇逐熱，問誰識、於中
味。漫說朝來拄笏，最宜人、西山晴翠。何如
一枕忘機，息影黑甜鄉裏。萬事悠悠，百年鼎
鼎，付之酣睡。待黃鸝三請，窺園乘興，倩花扶
起。

念奴嬌 登陽臺山絕頂望明陵

登臨縱目，對川原繡錯，如接襟裏。指點十三

陵樹影天壽低迷如阜。一霎滄桑。四山風雨。
王氣銷沈久。壽生金粟。老松疑作龍吼。惟
有沙草微茫。白狼終古。滾滾邊牆走。野老也
知人世換。尙說山靈呵守。平楚蒼涼。亂雲合
沓。欲酌無多酒。出山回望。夕陽猶戀高岫。

味梨集

甲午乙未

滿江紅送安曉峯侍御謫戍軍臺

荷到長戈已禦盡。九關魑魅。尙記得悲歌請
劍。更闌相視。慘淡烽煙邊塞月。蹉跎冰雪孤
臣淚。算名成終竟負初心。如何是。天難問。

憂無已。真御史。奇男子。只我懷抑塞。魏君欲
死。寵辱自關天下計。榮枯休論人間世。願無
忘。珍惜百年身。君行矣。

八聲甘州送伯愚都護之任烏里雅蘇

臺

是男兒。萬里慣。長征。臨歧漫淒然。只榆關東
去。沙蟲猿鶴。莽莽烽煙。試問今誰健者。慷慨
著先鞭。且衷平戎策。乘傳行邊。老去驚心
鼙鼓。歎無多憂樂。換了華顛。儘雄虺瑣瑣。呵
壁問蒼天。認參差神京喬木。願鋒車歸及中

興年休回首，算中宵月，猶照居延。

水龍吟 乙未燕九日作

東風不送春來，如何只送邊聲至。斷雲閣雨，
簾櫳似夢，冷清清地。鑪火慵溫，唐花欲謝，惱
人天氣。更無端清角，乍淒還咽，直爲喚新愁
起。記得年年燕九，鬧銅街春聲如沸。香車
寶馬，青紅兒女，白雲觀裏。節物驚心，清游誰
續，好懷難理。算勝他鐵甲，衝寒墮指，向沙場
醉。

金縷曲 二月十六日紀夢

夢境非耶是。是分明親承色笑融融。洩洩晴
日房櫺周旋久。左右孺人穉子。恍歷歷少年
情味。懊恨晨鐘催夢轉。擁寒衾往事零星記。
賸點點。行行淚。不堪衰鬢成翁矣。試回頭
卅年彈指。悲懽夢裏。難得宵來團圓樂。情話
依依在耳。似遠別恩恩分袂。若是九原仍骨
肉。算此身此日。翻如寄。非耶是。問誰會。

清平樂次園公韻

百年草草。元髮無多了。負手長空看過鳥。青
鏡本無塵到。逍遙我笑南華。華胥夢裏誰

家。好是春風浩浩，吹開吹落千花。

虞美人

春衣欲試寒猶重，愁是東風種。閒拋金彈打流鶯。不道天涯蕩子，尙關情。屏山可有人行處，禁得愁如許。拚教花落舞山香。誰向曲中念取惜春陽。

念奴嬌 星岑爲題戴笠圖殷殷以事功相助勉倚調賦謝並致媿辭

男兒墮地，看風雲咫尺，幾曾心死。也識荒雞聲不惡，無那鬢星星矣。鉛杵生涯，權椎事業。

俯仰猶餘恥。篋中鳴劍。夜深休吐光氣。堪
歎得失雞蟲。百年未滿。寸寸彎強似。坐對畫
圖。心語口。蓑笠諒非難事。邱壑因循。塵埃襤
襪。微尚仍虛寄。媿君良厚。拂衣行釣雲水。

唐多令 四月初九日作

春樹噪昏鴉。春城咽暮笳。正紛紛紅雨迷花。
都是東風來往路。恁回首。便天涯。 簾幙幾
重遮。深深燕子家。莫思量舊日繁華。紙醉金
迷誰會得。已春色。一分差。

祝英臺近 次韻道希感春

倦尋芳、慵對鏡、人倚畫闌暮。燕如鶯猜、相向甚情緒。落英依舊、續紛輕陰難乞。枉多事、愁風愁雨。小園路。試問能幾銷凝。流光又輕誤。聯袂留春、春去竟如許。可憐有限芳菲、無邊風月、恁都付等閒花絮。

玉漏遲

望中春草草。殘紅卷盡、舊愁難掃。載酒園林、往日游情倦了。幾點飄零花絮、做弄得陰晴多少。歸夢好、宵來猶記、驂鸞親到。尾長翼短如何、算愁裏聽歌也、傷懷抱。爛錦年華、誰

信春殘。恁早留取花梢日在。休冷落舊家池沼。吟思悄。此恨鷓鴣能道。

點絳脣餞春

拋盡榆錢。依然難買春光駐。餞春無語。腸斷春歸路。春去能來。人去能來否。長亭暮。亂山無數。只有鷓鴣聲苦。

南鄉子

爛醉復奚疑。紅瘦偏憐眾綠肥。聽徧禽言行不得。誰知。坐看春光冉冉歸。底事有成虧。一曲英皇遠別離。待把長竿浮大澤。依依雲

水微茫意轉迷。

鶯啼序子苾示讀同叔問登北固樓用

夢窗韻聯句之作觸我愁思仍

用原韻奉命

無言畫闌獨凭。黯吟懷似水。絮風悄換到鶉聲。亂紅飄盡殘蘂。聽幾度邊笳自咽。鄉心遠逐南雲墜。悵風塵極目。栖栖總是愁思。沈醉休辭。浮名過羽。底英雄豎子。儘空外歸鴈聲酸。碧山人遠。莫至。恁天涯登臨弔古也。雲裏帝城遙指。算長堤芳草萋萋。解憐幽意。

新詞讀罷琴筑蒼涼。想寤歌獨寐。清嘯對江。
山形勝。坐念當日名士新亭。暗傾鉛淚。聽輪
電卷。驚濤夜湧。承平簫鼓。渾如夢。望神州那
不傷愁悴。風沙滾滾。因君更觸前游。驚心短
歌聲裏。長安此日。斗酒重攜。且吟紅寫翠。
漫省念關山飄泊。海水橫飛。怕有城烏喚人
愁起。與君試向危樓凝睇。綠陰如幙。芳事歇。
惜流光誰解新聲倚。從教淚滿青衫。俯仰蒼
茫。恨題鳳紙。

鷓鴣天 偶欲爲詞率成五十五字索解

人不得也

喚取花前金叵羅。醉時了了醒時歌。東風去
任無憑準。柰爾雞聲馬影何。雲慘淡、雨滂
沱。金城楊柳自婆娑。不知生意誰矜惜。銷得
先生老茗柯。

入聲甘州 芳菲已歇。懽懽事去，心濁酒孤。
吟悽然念遠，不識一聲河滿。
視此何如耳。

甚年年花底說春歸。今年倍傷情。倚闌干不
語。水分新綠。天蹙遙青。點檢奚囊題句。賸得

瘞花銘。消受清和意。簾額塵輕。愁裏漫聽
鷓鴣。算天涯。啼徹。都是離聲。悵故人不見。落
日自高城。更休逐孤雲。南望。但平林如薺野
煙生。家山遠。寫朱絃。恨誰弔湘靈。

南鄉子

斜月半牕明。凍雨晴時淚未晴。倦倚香篝溫
別語。愁聽鸚鵡催人說。四更。此恨拚今生。
紅豆無根種不成。數徧屏山多少路。青青一
片煙蕪。是去程。

徵招過觀音院追悼疇丈用草窗九日

懷揚守齋韻

林梢舊灑西州淚。驚隨暗塵飛到。吟思滿蒼
煙。恨倚闌人渺。殘僧驚客老。問哀樂中年多
少。冷落招提。夢痕重省。晚鐘催覺。翻幸錦
鯨游。胡笳怨不入高山琴調。愁影亂蒹葭。儘
長歌敲帽。凌雲書勢好。與誰證酒邊孤抱。料
今夜。月落梁空。定斷魂淒照。

驀山谿

流雲試雨。潤逼琴絲緩。池館綠陰濃。炫金英
小槐黃綻。營巢燕子。日永哺雛忙。鑪煙定。漏

聲遲涼意生羅扇。懷人斷句。閒劃闌干徧。
不是愛言愁。一回吟一程人遠。試鐙時候。數
過棟花風。曾幾日。又新蟬。此恨憑誰遣。

齊天樂薰風南來殘暑自退星岑以新

作見示依調奉酬時六月五日

鳳樓西北關情地。嗚咽醉花私語。聽雨前番。
歸雲此夕。已是不禁離緒。荷衣漫與。問雙槩
來時。舊逢懽處。比翼鷓鴣。爲誰顛倒意如許。
旗亭題句尙在。風流人共說。江上孫處。醉
墨空揮穠春易失。月偃虛堂如霧。凌波路阻。

早負卻。拏芳斷腸尊俎。夢影迷離。曉鐘驚覺
否。

一斛珠

雨鬢風虐。寒山如睡。何曾覺。黃花輕負重陽
約。離恨誰知。人遠鴈難託。當時心力空拋
卻。天涯原在紅闌角。愁濃莫戀。邨醪薄。入骨
相思。禁得幾回錯。

徵招得夔生白門書卻寄

鴈聲催落空梁月。淒然頓驚離緒。料得據梧
吟。鎮沈冥誰語。露荷彫枉渚。更休問。采香儔

三
一
獨酌不
成。權霜風緊。落葉打窗如雨。蕭瑟對江關。憶
蘭成詞賦。秣陵秋幾許。定愁滿古臺煙樹。夜
堂悄。有夢從君。化斷雲千縷。

一叢花長夜薄病短夢頻回窗月鄰雞
清寒入骨用東坡病起韻

睡鄉安穩夜如年。燈乳綴花妍。虛堂漏定吟
魂悄。枕函靜思落誰邊。羅幙徘徊。紋疏皎潔
應是月輪圓。薄寒依約上屏山。塵夢淡於
煙。老懷不耐雞聲惡。儘長路鞭影爭先。爲報

鄰鐘暫時休打，容我五更眠。

鷺翁集

丙申丁酉

鵲蹋枝馮正中鵲蹋枝十四閨鬱伊憐

悅義兼北興蒙暗誦焉春日端
居依次屬和憶雲生二云不爲無
益之事何以遣有涯之生三復
前言我懷如揭矣

落葉殘陽紅片片。懊恨比鄰，盡日流鶯轉。似
雪楊花吹又散。東風無力將春限。慵把香
羅裁便面。換到輕衫，懽意垂垂淺。襟上淚痕

猶隱見。笛聲催按梁州徧。

斜日危闌凝佇久。問訊花枝。可是年時舊。濃
睡朝朝如中酒。誰憐夢裏人消瘦。香閣簾
櫳煙閣柳。片霎氤氳。不信尋常有。休遣歌筵
回舞裏。好懷珍重春三後。

風蕩春雲羅樣薄。難得輕陰。芳事休閒卻。幾
日啼鴉花又落。綠牋莫忘深深約。老去吟
情渾寂寞。細雨檐花空憶鑿前酌。隔院玉簫
聲乍作。眼前何物供哀樂。

漫說目成心便許。無據楊花。風裏頻來去。悵

望朱樓難寄語，傷春誰念司勳誤。枉把游
絲牽弱縷，幾片閒雲，迷卻相思路。錦帳珠簾
歌舞處，舊懽新恨思量否。

誰遣春韶隨水去，醉倒芳尊，忘卻朝和暮。換
盡大堤芳草路，倡條都是相思樹。蠟燭有
心燈解語，淚盡脣焦，此恨銷沈否。坐對東風
憐弱絮，萍飄後日知何處。

幾見花飛能上樹，難繫流光，枉費垂楊縷。箏
鴈斜飛排錦柱，只伊不解將春去。漫許心
情黏地絮，容易飄颺，那不驚風雨。倚徧闌干

誰與語。思量有恨無人處。

卜算子影照小像倩穎生作圖先之以

詞

構景未須奇。要稱蕭閒我。邱壑中間謝幼輿。
此意平生頗。湍急倚山攔。峯巒將雲裏。雲
淡山虛水自清。終老斯鄉可。

阮郎歸擬浣花

雛鶯啼去怨春殘。餘香襟裏斑。朱絃辛苦再
三彈。心期深訴難。金鷗冷。黛蛾攢。依依山
上山。將雛花好自愁簪。由他紅半闌。

浣谿沙題了兵備丈畫馬

苜蓿闌干滿上林。西風殘秣獨沈吟。遺臺何處是黃金。空闊已無千里志，馳驅枉抱百年心。夕陽山影自蕭森。

鷓鴣天

笑裏重簪金步搖。鸚哥學語儘能嬌。祇愁淡月朦朧影，難驗微波上下潮。牋十色，燭三條。東風從此得愁苗。靈蕤祕記分明在，回首神峯萬仞高。

鬪莎行

荷淨波涼。草枯塵細。一年最是秋容易。生憐
花鳴儘能言。橫塘冷煥。眞知未。落窠吟情。
刁騷涼吹。耽閒偏識愁滋味。白波浩蕩。指鷗
天紅闌。擲角秋無際。

減字木蘭花

婆娑醉舞。呵壁無靈。天不語。獨上荒臺。秋色
蒼然自遠來。古人不見。滿目荆榛。文字賤。
莫莫休休。日鑿終爲渾沌憂。

金縷曲辛峯至自汴梁出示所作和稼

軒詞數十篇讀之喜不自禁卽

川稼軒韻題此索和辛峯將就
鹽官於淮南以覲事漸留度歲
離合之感雖不能無慨於中而
風雪聯牀歌聲相禽此樂亦平
生得未曾有也

心事從何說。算平生等閒銷盡。酒漿裘葛。回
首麻衣十年恨。淚盡隴山冰雪。暗循徧絲絲
華髮。何物向禽兒女累。負歸雲。夢沙瀧岡月。
聽夜雨。共蕭瑟。暫時攜手還輕別。望江湖
風塵瀕洞。星萍離合。一度相逢一回首。冷語

淒然砭骨。且莫對寒檠。愁絕。四海子由真健者。慣商歌。斫地錚如鐵。霜竹冷。爲君裂。

沁園春 烏佛祭詩 豔傳千古八百年來
未有爲詞修祀事者今年辛峯
來京度歲 佾酬之樂雅擅一時
因於除夕陳詞以祭譜此迎神
而以送神之曲屬吾弟焉

詞汝來前。酌汝一杯。汝敬聽之。念百年歌哭。誰知我者。千秋沆瀣。若有人兮。芒角撐腸。清寒入骨。底事窮人獨坐。詩空中語。問綺情懺。

歎我亦無端，鬢絲衰早。彈淚西風，霜空孤鶴
渺。

祝英臺近古微見示新作吟諷不能去
口依韻成此不足言和也

裏藏鉤，花覆局，一一墜懽記。箏鴈塵封，慵覓
箇人字。是誰玉笛飛聲，星辰昨夜，又容易夢
雲吹起。憶前事，爭信冷落琴心，相如倦游
矣。吹絮拈花，愁多懺無計。早知中酒光陰，困
人如此，悔輕到碧油簾底。

蝸知集 戊戌

臨江仙枕上得家山。一語漫譜此調。夢

生於想歌也。有思不自知其然
而然也。

歌哭無端。燕月冷。壯懷銷到今年。斷歌淒咽。
若爲傳家山。春夢裏。生計酒杯前。茆屋石
田荒也得。夢歸猶是家山。南雲回首落誰邊。
擬呵湘水壁。一問左徒天。

瑞鶴仙古微移居上斜街鄰顧俠君小

秀野草堂卽查查浦故居也賦

詞徵和因憶咸同間吾宗龍壁

翁居此時適得王元章墨梅十
二巨幀遂榜其西齋曰十二洞
天梅花書屋事見龍壁山房庚
申集藉廣古微所未備並以諗
後之志東京夢華者俾有考焉

翠深天尺五。認秀野風流。銀灣斜處。閒鷗淡
容與。是百年見慣。騷壇旗鼓。春風胥宇。想生
香梅花萬樹。正南窗燠入橫枝。約略洞天雲
古。凝佇。朋牋韻事。拄笏高情。承平簪組。藤
交陰嫵。誰其覓舊題句。勸先生莫忘玉壺觴。

我準備新詩賞雨。怕窺檐一角。西山笑人自苦。

念奴嬌 和仲淵似園小坐用玉田韻

餘寒猶滯。甚槐街喧徧。報晴鐘鼓。芳節三分都過二。闌檻幾家春聚。漁父桃花。王孫芳草。休問年時路。西山今日。高樓心事無數。那得卻掃如君。不知許事。自適閒中趣。老境閒門。思種菜。未要木奴千樹。長劔慵看。酒杯擲下。飛夢滄洲去。化爲兩鳥。忘機共狎鷗鷺。

鷓鴣天 詠燭

百五韶光雨雪頻。輕煙惆悵漢宮春。祇應憔悴西窗底。消受觀書老去身。花影暗。淚痕新。郢書燕說向誰陳。不知餘蠟堆多少。孤注曾無一擲人。

浣谿沙 疊韻 俞次珊

許事人間未要知。杜鵑聲裏日遲遲。低頭臣甫更無詩。身世相看原蟣蝨。文章何處不駢枝。楚蘭腸斷獨醒時。

萬里長風萬里沙。晚晴消息散餘霞。百年趨趄是生涯。短鍤未妨行處荷。戒香不放定

中斜。且拈新句。酌新花。

西河燕臺懷古用美成金陵懷古韻

游俠地。河山影事還記。蒼茫風色淡幽州。暗
塵四起。夢華誰與說興亡。西山濃翠無際。

劔歌壯。空自倚。西飛白日難繫。參差煙樹隱
觚棱。薊門廢壘。斷碑漫酌望諸君。青衫鉛淚
如水。酒酣擊筑。訊舊市。是荆高歌哭鄉里。
眼底莫論何世。又盧溝冷月。無言愁對。易水
蕭蕭悲風裏。

水龍吟 分韻賦白芍藥得後字

倚闌獨殿羣芳，肯將顏色隨紅瘦。冰壺凝液，
玉槃承露，蝶窺蜂逗。壓架酴醾，吹簾柳絮，影
迷堦甃。悵彩鸞信渺，月斜煙淡，知甚處、香來
驟。歌舞揚州最好，正春濃、瓊花開後。含顰
欲語，將離有恨，粉痕微皺。和露簪餘，嬌分素
靨，酥凝纖手。只鬢絲老去，西園寂寞，把韶華
負。

綺寮怨以疇丈鶴公所書聯吟詞卷屬
叔問作感舊圖於後卷中同人
惟悲公與予尙無恙而十年久

別萬里相望歎逝傷離不能已
已用美成詞體以寫嗚咽

莫向黃壚回首斷歌催恨生。聽燕語似惜華
年行吟處。蘚徑塵凝。東風吹愁不去。空贏得
淚墨懷衷盈。憶舊游望渺孤雲。人天感歎息
還自驚。想念素襟共傾。闌千萬里花前惜
別同憑。顧影伶俜。賸華髮對山青。江關故人
無恙。試說與。若爲情。今宵酒醒。空梁月落處
愁更明。

鷓鴣天讀史偶得率成一闋

卅載龍門世其傾。腐儒何意占狂名。武安私
弟方稱壽。臨賀嚴裝促辦行。驚割席。憶橫
經。天涯明日是春城。上尊未拜官家賜。頭白
江湖號更生。

羣彥英英祖國門。向來宏長屬平津。臨歧獨
下蒼生淚。入百孤寒媿此君。傾別酒。促歸
輪。壯懷枉自託風雲。劇憐彩鷁乘濤處。親見
蓬萊海上塵。

前調續讀史吟補錄端午次日作

屬國歸來重列卿。楊家金穴舊知名。似傳重

訂冰山錄那得長謠潁水清。仙仗入篋書
傾空令請劍壯朱生。好奇事盡歸方朔、殿角
微聞叩首聲。

太常引

綠槐蟬咽午陰趁。殘夢尙婆娑。不是愛婆娑。
這幾日風多雨多。迎涼散帶、銷憂擊柱、醉
醒一行窩。攬鏡意蹉跎。歎白髮催人幾何。

塞翁吟風雨時至溽熱如炙綠衫見投

新詠率賦以當報章昔紫霞翁
論擇腔謂此調衰颯戒人毋作

然邪許相勞與興會。臆舉者聲
情自異得失之故。願與綠衫相
尋於絃外也。

萬木酣風處。空際暮色蕭森。暗雨氣小樓陰。
聽高下蟬吟。雷聲忽送千山響。驚破眾竅如
暗。看一霎斷雲沈。卷舒本無心。清琴商歌
歇。治痕細數。香徑渺前游。重尋任逐熱長安。
襖穢自高臥。世覓羲皇散髮。抽簪濃霧未解。
望裏懸知。猶鬱疏襟。

醉花陰 姬人抱賢嗜誦宋元人小詞夏

夜鐙火不可親，偃臥北窗令回。
環循誦時，復入聽，亦迎涼幽致
也。

臥聽清吟銷篆縷，抵得紅簫否。香挹素馨微。
方翹疏簾，不辨涼生處。老嬾心情渾漫與。
賸訂花閒譜。學道未應妨。笑問維摩，可是朝
華誤。

水龍吟 戊戌小除立己亥春夢湘同作
歲寒禁慣冰霜，隔年翻訝春何早。錦旛貼處，
玉梅香裏，酌春一笑。春遣儂愁，儂將春負，悶

懷丁倒。算重城煙景。花明柳媚。原未覺繁華
少。大塊文章誰假。占春先翠蛾兒鬧。番風
無賴。催完芳信。便催人老。金埒游情。玉壺吟
思。莫教閒了。看忘情彩勝。盈盈弄影。向釵梁
裏。

半塘定稟卷之一

半塘定稟卷二

臨桂王鵬運佑遐

校夢龕集

己亥

東風第一枝 己亥人日社集四印齋賦

得人日題詩寄草堂

句占花先春歸鴈後銷凝歲事如許絕憐開
寶詩人感時幾縈別緒多情梅柳似解惜城
南幽旅憶彩牋迸淚題殘頓觸亂愁千縷

醒醉裏盛年暗度歌哭外舊游何處已拚書
劍飄零老懷倦裁秀句天閒一我更媿爾高

三十五。只小窗慵夢橋西。約略歲朝吟趣。

清平樂十四日晨起意有所會率筆書

此以俟賞音

花閒清坐。坐久渾忘我。好句自來還錯過。斷續幽禽如和。邈然山水虛深。昭文欲鼓無琴。誰信百年泡幻。等閒一刻千金。

驀山谿

塵緣相誤。大錯從何鑄。歸夢碧山遙。水雲空人閒難住。落梅如雪。拂面作春寒。登廣武。泣新亭。先我傷心許。雨巾風帽。著酒長安路。

老至厭悲歌。炙銀簧玉鞞寒。百年浩蕩。憔悴惜初心。飛鳥外。落霞邊。那是愁來處。

玉漏遲 百穫亭夜宴有贈

清歌花外裊。卅年綺夢。無端驚覺。影散優曇。那似情塵難掃。根觸春衫淚點。又雛燕。泥人癡小。新恨悄。渭城還唱。何堪淒調。幾度顧影臨風。問舊日當歌。是何年少。花落花開。詩裏劉郎輕老。愁訴貞元軼事。只我也。不禁潦倒。休暗惱。明朝鏡霜添了。

念奴嬌 日望樓春眺有懷仲弓

東風吹面，又等閒、春色三分過。一。懽事難期，
花易老，莫放闌干閒裏。怨極書空，愁來說夢，
舊曲還慵理。春雲無恙，林鶯休訴，憔悴。遙
指一角飛檐，百年裙屐，盛江家亭子。韋杜風
煙天尺五，銷得流光如水。經醉湖山，笑人魚
鳥，自惜登臨意。小桃紅綻，嫣然知向誰媚。

楊柳枝擬花間

賦裏長楊舊有名。卽看眉樣亦傾城。春風軟
入朝元閣，莫更思量作雨聲。

飛絮空濛鎖畫樓。年年寒食聽離留。爭信龍

池三二月。片風絲雨欲驚秋。

齊天樂 馬神廟海棠百年故物也春事

方酣意古微日吟賞其下不能
無詞擬此待和

豔陽初破瓊姬睡。依稀沁園軼事。繡幄圍鴛。
簫臺駐鳳。隔斷香紅塵世。絲華夢裏。記別殿
承恩。綠章催霽。幾番花風。舊時香色底憔悴。
承平歌舞漫憶。儘燒殘絳燭。密意誰會。海
燕移家。仙雲換影。贏得嬾娥清淚。殷勤步綺。
莫付與鶯鄰。妬春桃李。黃月簾低。倩魂縈倦。

藥。

鳳凰臺上憶吹簫。集香草亭賦簫。

明月依然。玉人何處。畫橋流水參差。記短歌
催酒。惜別年時。休問笛家舊譜。寒食近。煙柳
絲絲。憐消受。分香手汗。浥潤脣脂。孤飛野
雲迹。渺還一舸。煙波自和新詞。問歲寒。疊鼓
春夢應迷。何事潛蛟夜舞。歌慷慨。懷古增悲。
頻吟弄。夫君未來。要眇誰思。

三姝媚 四月十日病起偶過咫邨回憶

年時吟事甚盛此時好夢難尋

孤游易感不知來者之何如今

也賦寄叔問蘇州叔由蕪湖

東園花下路。記盟香年時。倦賡零句。病起心
情。洗芳林。厭聽夜來風雨。開到將離。春自老
無人爲主。蝶鬧蜂喧。遮莫紛紛。總過牆去。

杜宇催人休苦。問廢綠迷津。勸歸何處。花影
吹笙。做畫簾空憶。月明前度。那得流光將恨
與頽波東注。目斷停雲靄靄。清琴自語。

渡江雲

清真集中諸詞夢窗多擬作俊

茂處能似之。言外絕不相襲。四

月十有八日意有所觸偶拈是

解

流紅春共遠。夢迷紫曲。風迫海雲飛。近來沾
酒伴。除指青旗。那處繫斑駁。黃金鑄淚。記弄
珠江上人回。懷舊吟笑。持明鏡。流影共徘徊。
天涯殷勤別緒。只有何戡。黯愁生清渭。回
首憐蓬萊。雲氣都隔紅埃。東風無奈流鶯老。
那更禁鷓鴣聲催。休采擷。江南紅豆誰栽。

徵招夔生自廣陵游鄂賦詞寄懷卻和

幾年落拓揚州夢。樊川倦游情味。一笛落梅

風又吟篷孤倚。江山仍畫裏。祇無那暮天愁
翳。白帽飄零。紅簫岑寂。暗銷英氣。迢遞。楚
天長。懷人處。扁舟舊時曾繫。黃鶴倘歸來。問
飛仙醒未。行歌休弔禍。怕塵浣素襟殘淚。斷
雲碧。醉拂闌干。正夜空如水。

三姝媚次珊讀唐人息夫人不言賦有感於外結舌而內結腸先箝心而後箝口之語賦詞索和聊復繼聲亦盍各之旨也

蘼蕪春思遠。采芳馨。愁貽黛痕深斂。薄命憐

五
花倚東風羅裊淚珠偷泣。暝入西園容易又
林禽聲變。那得相思付與青蘋。自隨蓬轉。
惆悵羅衾捫徧。便夢隔懽期。舊恩還戀。芳意
迴環。認鴛機錦字。斷腸絨怨。縷縷絲絲。拚裊
盡香心殘篆。漫想歌翻璧月。臨春夜滿。

鷓鴣天 向與二三同志爲讀史之約意

有所得卽以是調紀之取便吟
諷久而不忘人事作輟所爲無
幾今年四五月間久旱酷熱咄
咄閉門再事丹鉛漫成此解並

告同志毋忘前約爲之不已亦
乙部得失之林也

注籍常通神虎門。書生恩遇本無論。鬼神語
祕驚前席。輓輅謀工拾後塵。空折角笑埋
輪。寓言秦鹿底翻新。可憐一闕成何事。贏得
班姬苦乞身。

金縷曲 六月十六夜日望樓對月

此夕眞無價。俯危樓羅雲四卷。玉槃高挂。裊
暑人間銷欲盡。涼韻未秋先借。又銀漢沈沈
西瀉。凝白闌干塵不到。是天然愛酒能詩社。

凌浩渺，最宜夜。乘風敢擬游仙也。檢塵襟，卅年緇素，暫時陶寫。玉宇瓊樓歸路迥，高處清寒猶怕。莫輕放花間三雅。狂態姮娥應見慣，倚商歌漫惜知音寡。看獨鶴，正來下。

唐多令

掠鬢練花長。筠棚卷夕涼。晚風輕煥玉生香。記得酒闌新月上，頻倚醉，近釵梁。老去不禁狂。通簾泥舊芳。話青樓殘夢荒唐。知是溫柔知薄倖，好持似，少年場。

滿江紅 辛峰沒於秦州七月三日設奠

成服賦此招魂老懷慘結墨淚
俱枯矣

淚灑椒漿誰信道望風醉爾試屈指夫涯骨
肉祇今餘幾一箇那堪今又弱諸孤藐爾知
何似最傷心愁病念兄衰書新至對牀約
歸耕計投老待君料理甚無端噩夢驚人至
此地下倘仍親舍伴固應勝我悽惶耳賦招
魂如墨海雲昏魂來未

臨江仙擬稼軒

暮北朝南忙底許多時齒冷樵風先生疏放

是天慵醉鄉閒日月安穩住無功。注籍黃
齎三百甕腐儒食料原充。思量無地著窮通。
忘機秋水觀得意大槐宮。

減字木蘭花擬樵歌

人生行樂老子婆娑歌帶索。蒼鶻參軍。竿木
逢場底是真。壺公知我獨醒何人真計左。
夢繞雲屏。一桁山如故國青。

卜算子擬蕭閒

把酒酌黃花。人盡陶彭澤。三徑無資也是歸。
此意誰能得。漫誦北風詩。自媿南邨宅。憑

仗秋山爲解嘲，明秀森寒碧。

點絳脣擬秋品

莫更憑高闌，珊瑚草色天涯暮。亂山無數，雲意閒如許。一葉扁舟，夢到尋詩處。愁延佇。斷鴻聲苦，寂寞龍湫雨。

戀繡衾擬梅谿

淡蛾山色入畫眞，撲游衫都是翠痕。寫不盡，幽修意，把詩魂分付斷雲。輭紅眯眼長安市，底相看，還似故人。乍憶得，妝臺畔，點吳孃眉黛，暈新。

浣谿沙擬梅屋

漸覺新寒上被池。曲屏山亞夢雲敲。團團明月影愁窺。試展眉圖迷眼纈，暗移裙袂惜腰肢。刀圭難已有情癡。

阮郎歸擬清谿

小窗西日透紋紗。飛塵生影花。似聞將雨報林鴉。啼聲清潤些。風蕩漾，樹天斜。晴光憎暮霞。臥驚殘溜響檐牙。煥餅新試茶。

庚子秋詞

庚子

蹋莎行

彩扇初閒。疏砧催斷。雲山北向征人遠。驚塵
莫漫怨飄風。岫眉好試新妝面。夢境迷離。
心期千萬。絲絲縷縷愁難翦。不辭舞裏爲君
垂。瑣窗雲霧知深淺。

訴衷情用夢窗韻

水雲如夢阻盟鷗。煙草亂汀洲。寂寥幽意誰
會。愁入曲江秋。空攬鏡。漫登樓。暗吳鉤。青
山隱几。烏角尋鄰。臣甫低頭。

謁金門

霜信驟。消得驚秋人瘦。昨日紅蓮今日藕。斷

賜君信否。人世悲懽原偶。休怨雨雲翻覆。
寶玦珊瑚珍重取。五陵佳氣有。

南鄉子

山色落層城。不爲塵多減舊青。只有看山前
度客。愁生。獨倚高樓眼倦橫。檐角暮雲停。
懷遠傷高淚欲傾。昨夢橫汾西去路。聲聲。塞
鴈驚寒不忍聽。

關河令

邊聲沈沈鴈共語。作一天愁緒。望極關河寒
深雲欲度。天涯何限舊侶。枉自戀樓臺高

處。斷夢都忘，衾塵誰念取。

胡擣練

年年芳事厭唐花。夢想江梅煙萼。誰信銅餅
冰合。愁對寒雲壓。老夫無味已多時。凍酒
和愁頻呷。寄語寒香休怯。好趁元綬臘。

虞美人題校夢龕圖

往與漚尹同校夢窗詞成卽擬作圖紀之
今年冬見明王綦畫軸秋林茆屋二人清
坐若有所思笑謂漚尹曰是吾校夢龕圖
也不可無詞因拈此調圖作於萬歷丁酉

乃能爲三百年後人傳神寫意筆墨通靈
誠未易常情測哉光緒庚子十月記

檀欒金碧樓臺好。誰打霜花稟。半生心賞不
相違。難得劫灰紅處畫圖開。 清愁閒對闌
干起。自惜丹鉛意。疏林老屋短檠邊。便是等
閒秋色儘堪憐。

遐方怨

槐葉落。露槃空。夢怯催妝。夜闌不聞長樂鐘。
玉蟾香鬢冷。西風恨。隨嗚咽水。御溝東。

鋸解令

駐雲誰按酒邊詞。翠裊冷殘醺未喚。新鶯舊燕自家春。底與較夢長夢短。隔花淚眼。爛錦年芳盼斷。東皇未必負春人。只蕩得暗愁一點。

玉樓春

好山不入時人眼。每向人家稀處見。濃青一桁撥雲來。沈恨萬端如霧散。山靈休笑緣終淺。作計避人今未晚。十年緇盡素衣塵。雪鬢霜髯塵不染。

前調和小山韻

落花風緊紅成陣。睡重不知春遠近。箏絃聲
啞。鎮慵調。燕語情多羞借問。屏山苦隔天
涯信。咫尺關河千萬恨。樓前芳草遠連天。望
眼不隨芳草盡。

閒雲何止催春晚。遮斷望京樓上眼。犀簾有
隙漏香多。鮫帕無情盛淚滿。柔腸已逐鷓
絃斷。風外闌干憑不煥。歸來十九醉如泥。禁
得良宵更漏短。

不辭沈醉東風裏。笑解金魚能值幾。四條絃
語軟於煙。一桁簾痕清似水。醉調銀甲寒

侵指只有翠尊知客意。酒雲紅暈襯微渦。解
向歌塵凝處起。

定風波和瞻園韻

愁裏清尊莫放停。笑看伶鋪是歸程。繞樹奇
鶻啼不止。曾幾舊時春色酒邊青。識字毫
端通畫意。審音窈畔得宮聲。活計安排支枕
睡。誰醉生先無夢也無醒。

山花子

天外冥鴻不可招。十年心迹負團瓢。老境蒼
寒誰慰藉。月輪高。嬾到冬山惟耐睡。愁呼

濁酒等閒澆。賴有梅梢春信逗。兩三椒。

唐多令 衰草和穗平

難刻是愁根。連天沒燒痕。漫萋萋、回首青門。
陌上銅駝如解語。定相向、怨王孫。別恨共
誰論。憑高空斷魂。更無煩、臘鼓催春。不見潛
行悲杜老。曲江上、幾聲吞。

浪淘沙 自題庚子秋詞後

華髮對山青。客夢零星。歲寒濡响慰勞生。斷
盡愁腸誰會得。哀鴈聲聲。心事共疏檠。歌
斷誰聽。墨痕和淚漬清冰。留得悲秋殘影在。

分付旗亭。

春蟄吟

庚子辛丑

尉遲杯次漚尹寄弟韻

和愁凭檻曲冷池灑斜陽影。淒迷一角殘山。
心事遙天催暝。飛鴻送響。驚獨客空堂酒初
醒。颭清霜。幾葉宮槐。亂鴉如墨。棲定。誰念
舊日神州。看青暗齊煙九點寒凝。清渭東流
無消息。哀淚與銀餅水迸。長歌斷。悲風自發。
正塵黯銅駝泣露梗。問柴桑甚日歸來。就荒
空憶三徑。

天香鹿港香

百和熏薇干絲裊玉。氤氳小葉初展。翠鏤筠筒。炷添螺甲。約略海南春淺。溫磨半裏。渾不數牟尼珠串。點檢西谿舊製。根觸玉臺殘怨。絕憐麝塵擣徧。怕蠻腥等閒還染。算只翠篝留得舊情一綫。芳訊依然月底。甚泛入槎風似天遠。纖縷紫簾南雲夢翦。香以施氏製者爲上其封

題曰氤氳奇柑綫

齊天樂鴉

城南城北雲如墨。紛紛颭空零亂。落日呼羣

驚風墜翼極目平林恨滿。蕭條歲晚。是幾度
朝昏。玉顏輕換。露泣宮槐。夜寒相與訴幽怨。
新巢安否。漫省繞枝棲未定。珍重霜霰。壞
堞軍聲。長天月色。誰識歸飛羽倦。江湖夢遠。
記噪影檣竿。舵樓風轉。意緒何堪。白頭搔更
短。

驀山谿夢中得句與此解起調適合因
足成之

和愁帶恨。憑得闌干破。消息問梅魂。料傷春
未應偏我。寒灰心死。猶自撥陰何。堪絕倒。子

桑琴裹飯知誰過。催年臘鼓不聽情猶可。
吟裏貯寒多。共西山凍眉深鎖。微茫斗外愁
認帝王州。自酌酒。問東皇。眞箇春回麼。

金明池荷花

東華塵土惟四時芳事差可與娛三百年
來名流觴詠屢矣今年夏秋以還高臺曲
池禾黍瀰望遑問一花一葉哉春風當來
舊游如夢閉門蟄處益復無聊偶憶屐齒
常經芳事最盛之處各賦小詞以寄遐想
蓋步兵之塗旣窮曲江之吟滋戚已嗟乎

慈仁之松廉野之柳足以堅歲寒而資美
蔭者既逸不可得卽秋碧春紅媚茲幽獨
亦復漂搖如此風月有情當亦替人於邑
也

環佩臨風樓臺寫影咫尺璇源路近秋色共
湖光無際疏香背冷雨暗引記年年翠陌籠
鞭是幾度神往菰蘆深隱算冷眼雲山忘機
鷗鷺省識吟邊幽恨忽漫飛塵驚掠鬢怕
木佩風襟舊情難問芳時換哀蟬曲破花夢
短野鴛睡穩裊空煙複道垂楊望太乙仙舟

歸期難準。賸泣露敲檠。飄零鉛淚。悄共銅仙
偷搵。

八犯玉交枝寄園朱藤

門掩青槐。架敲朱珞。曲徑倩痕低亞。惟有玲瓏檐外月。慣見琴尊瀟灑。尋芳攜酒。最憐才魄銷沈。花前吟事憑誰話。長記采香。攀蔓。年年初夏。惆悵舊日樓臺。翠陰覆處。黯然愁對鴛瓦。問誰信東風。裊娜也。分占滄洲殘畫。儘輸與。梨雲影謝。腥塵不浣。紅闌罅。只夢憶。繚枝。天池甚日歸來也。

予舊籍山陰徐文長。天池書屋青藤間至。

今尙
存

夢橫塘野鳧潭蘆花

短碣飛雪別浦流雲暮天涼意初覺野色遙
連暗隔斷紅香城郭刻意尋秋不堪愁鬢等
閒迷著憶扁舟舊隱月落潮生游情倦風波
惡江亭記得春歸正迷離萬綠雨潤闌角
短笛聲催愁更說蹋青前約最憐是鷺鷥斷
鴈聚影澄潭怨飄泊付與霜楓冷紅獨舞媚
西風簾幙

淒涼犯用白石韻

夕陽一抹。風簾靜。清吟不盡蕭索。鈿車寶馬，
懽情轉首，恨生清角。傷春夢惡。斷紅沁殘陽
影薄。甚怱怱珠旛彩勝，障眼總塵漠。休念
開元日，尺五城南，蹋歌聲樂。麝塵濺處，顛鸞
龍寶釵零落。海樣鶯花，俊游事銅駝記著。只
疏梅，月底弄影未負約。

花犯用清真韻

渭城西。絲絲倦柳，催人試愁味。雪欺霜綴。休
更說腰肢。風外纖麗。玳筵舊日清歌倚。投壺
天正喜。尙彷彿雲屏寒淺，添香偎繡被。梨

園至今散如煙，風塵共弔影。驚心彫悴，腸暗
斷，凝碧上管絃。淒墜。東風颺落花似雪，誰更
識龜年愁病裏。算付與龍鍾雙裏，潛痕清瀉
水。

念奴嬌 二月十二日妙光閣下感賦

沈屯雲亂，倚闌干，愁對春山顏色。芳事無情，
翻有信，依舊小桃紅坼。鳥語關關，簾痕黯黯，
容易鮀華擲。樓臺無恙，到來多少塵隔。漫
憶楚客當年，朋牋花底，秀語分寒碧。吹淚庭
槐，親酌取，此是滄桑曾歷。落日琴聲，遙天蜃

氣新恨誰銷得。迴腸斷盡，隔籬休送殘笛。

滿江紅敬書岳忠武王贈吳將軍寶刀

行墨蹟後

雷雨空堂，驚展卷龍蛇起陸。瞻拜處凜然如
見，劍光盈軸。灑氣縱橫山欲撼，交情鄭重杯
相屬。想夜闌盾墨灑淋漓，歌還哭。暗鳴氣，
悲涼曲。千萬遍，循環讀。歎王刀可假，何堪重
辱。悵望千秋人不見，相尋一轍車還覆。問誰
歎雪涕和哀歌，燕臺筑。

倦尋芳初夏和漚尹

晚花颺蘂新漲添痕芳序輕換寂寞東園春
事去來誰見點屐長愁涖徑滑穿林驚又禽
聲變掩簾櫳試香心宛轉暗灰殘篆看檻
外沈陰如墨惻惻生衣寒意猶戀漫想薰風
腸斷綠雲天遠午枕時敲歸夢熟屏山閒倚
吟情倦話相思付空梁調雛雙燕

長亭怨慢和忍盦春盡書懷之作

更休憶綠陰前度門巷惜惜亂愁如據燕子
飛來舊巢塵浣定淒楚一襟幽恨吹不斷閒
風雨忍淚對流紅看送到春潮何處無語

望停雲靄靄，尙戀夕陽高樹。江湖夢影暗愁
逐春城風絮。訴不盡似水心情，向鶉鳩聲中
分付。漫回首，西山腸斷，青青眉嫵。

南潛集

辛丑至甲辰

水調歌頭初至金陵諸公會飲秦淮酒

邊感興索瞻園蔥石積餘和

微風轉城曲，涼意乍先秋。不知今夕煙月，何
事爲人留。欲訪齊梁陳迹，但見珠歌翠舞，鐙
火夜光浮。孤嘯倚舷立，釀酒醉沙鷗。興亡
事，醒醉裏，恨悠悠。微茫空外雲氣，直北是神

州爲問青谿舴舺來往撇波雙槳載得幾多
愁漫灑新亭淚吟思渺滄洲。

滿江紅朱仙鎮謁岳鄂王祠敬賦

風帽塵衫重拜倒朱仙祠下尚彷彿英靈接
處神游如乍往事低徊風雨疾新愁黯淡江
河下更何堪雪涕讀題詩殘碑打黃龍指
金牌亞旌旆影滄桑話對蒼煙落日似聞叱
咤氣讐蛟鼉瀾欲挽悲生笳鼓民猶社撫長
松鬱律認南枝寒濤瀉道光季年河決開封
舉鎮惟岳祠無恙壬

午扶護南歸

曾夢游祠下

月華清壬寅中秋

金粟浮香，冰輪碾玉，閒庭風物如畫。弄影婆娑，一笑襟塵都灑。倩西風、丁屬姮娥，休更遣羅雲縈惹。愁話憶年時，斷夢醒來還怕。難忘瑤臺清暇。是佳約、延秋朋牋催砑。把瑱懷人自醉，孤光遙夜。試說與鏡裏悲懽，儘銷得吟邊陶寫。慵借問游仙枕畔，彩鸞誰跨。

念奴嬌疊韻酬漁公

津梁疲矣，且相從一飽，茆檐不托。輸與閒閒雲意嬾，不似客游輕作。殘霸關河，悲秋時節。

對酒渾忘酌。綺懷微倦，滿前新句慵索。何
必憔悴蘭成，江潭賦就，始解傷搖落。官柳垂
垂低颭影，能值幾絢絲絡。白髮閒搔，青山長
往，萬事風鳴鐸。故人書報，菊花期就前約。

驀山谿午發桃源明日抵清河矣

東來十驛，漸報郵籤，駭驚埃嬾於人。定憐客
往還何驟，老懷蕭散，隨分傲霜風。算心事，白
鷗知，遲我江湖久。襟塵歷歷，香凝長安酒。
大道直如繩，倚南轅，黯然而回首。不夷不惠，料
理著閒身。吳波闊，楚天長，好試扁舟手。

水調歌頭 淮安舟中

唱我遠游曲，喚起大魚聽。百年知幾行樂，莫
視酒杯輕。記取明朝重九，訪古文游臺畔，黃
菊重尋盟。吟嘯霜風裏，破帽恰多情。弔王
孫，淮水曲，酒還傾。叢蘆風過瑟瑟，似作不平
鳴。身計正須溫飽，底用登壇開國，一擲徇浮
名。試看滄波冷，鷗夢不能驚。

聲聲慢 辛園小憩同旭莊

雜花鋪繡，淺草裁茵，憑闌野色浮空。敗柳枯
荷，商聲遞入金風。怱怱載花載酒，對閒園纔

識秋容。悄相向、借吳波漲綠。與洗塵紅。誰
唱白銅鞮曲。趁如雲嬌馬、流水西東。橋下龜
魚也應驚到吟筇。風光自延倦客、倚殘曛閒
數疏鐘。海天迴、寄愁心、煙外斷鴻。

霜葉飛海上喜晤漚尹用夢窗韻賦贈
時漚尹持節嶺南予適有吳趨
之行。悠悠聚別離緒。黯然矣。

酒邊孤緒。游情倦閒雲自戀江樹。槎風欣送
故人來。香汛梅根雨。歎冉冉流光迅羽。殘灰
愁憶昆池古。好寄似南枝、嶺上早春回。莫負

玉娥幽素。回首秋鬢驚塵。瓠稜北望，黯然腸斷愁賦。白頭不擬此重逢，喜入鐙昏語。看驛柳煙絲颭縷。吳篷先載閒鷗去。賸夢君滄江上，霓節干雲，使星明處。

鷓鴣天 登元墓還元閣用叔問重泊光

福里韻

雲意陰晴覆寺橋。秋聲瑟瑟徑蕭蕭。五湖新約尊前訂，十月輕寒畫裏銷。憑翠檻，數煙橈。一樓人外萬峰高。青山閱盡興亡感，付與松風話市朝。

齊天樂 泊舟光福故友許鶴巢郎中鄉

里也感題此解

峭帆乍轉橫塘路。湖山頓驚愁眼。雙崦茶煙，
四橋松雨，曾記吟邊深綵。梅林弄晚，訪醉墨
題香，紫簫聲斷。喚起秋魂，荒荆何處舊池館。
滄波相對欲絕，亂雲攜酒處，愁繫孤纜。臨
頓前盟，東華舊侶，誰識塵衫游倦。斜陽淚滿，
聽啼鳥花間，故情輕換。怨笛難招，虎山孤鶴
遠。

翁尚書詩目鶴巢爲虎山一鶴

水龍吟 惠山酌泉

黛眉不點吳娃，淩波獨秀空煙際。疏林霜染，
深蹊苔澀，虛堂瀾綺。濺沫跳珠，清聲瀉玉，石
鱗荒翠。自憑闌照影，古人不見，閒愁逐、輕鷗
起。一桁竹鑪煙細，臥聽松箏，琵琶淨洗。孤懷
誰識，臨風把酒，低徊問水。斜日游船，古陰秋
苑，笙歌催醉。喚銅餅載取，歸來重試，在山泉
味。

洞仙歌 吳江楓老以雜樹閒之尤鮮麗

可玩舟中讀玉，淫詠葉諸詞，卽

用其調以誌幽賞

疏黃敗綠愛寒林江步掩映吳楓冷紅舞炫
秋容最是徑轉帆迴鴉背閃點點夕陽明處
暮山嵐翠斂持底明妝認取籠煙幾行樹
老去綺情剛溝水東西愁更憶題瓊殘句儘
豔入詩心比春花歎誰識麤霜歲寒良苦

念奴嬌 追暑焦山自然庵爲庵主六公

題如此江山圖用東坡赤壁韻

雲埋浪打想髯翁當日吟邊風物問訊江山
無恙否目斷巖巖蒼壁斷續驚濤聯翩游屐
好句留冰雪焦仙醒未爲予喚起英傑最

是棖觸愁心。禪天梵放，雲外清笳發。撲地蒼煙飛不起。海氣浮空明滅。秋色西來，中原北望。天遠青如髮。孤光不改，多情祇有圓月。

木蘭花慢 歸德訪西陂故址

緯蕭圖畫裏，記親見、草堂幽。甚浴鴨池荒，棲鶯柳老，春淡成秋。汀洲釣人居處，有平泉樹石記中收。賸得殘山一角，冷煙低冑閒愁。

悠悠往事問沙鷗。文采宋黃州。是少日兵戈，承平觴詠，投老菟裘。扁舟待盟舊隱，悵暮天無際，亂雲流。怕有夷歌夜起，驚心慵聽漁謳。

浣谿沙

老去耽游藉息機，四年三度此停騑。巫山仍
隔楚雲西。野驛風高塵漠漠，首春寒重霧
霏霏。醉呼濁酒自添衣。

半塘定稿卷之二

半塘賸橐

臨桂王鵬運佑遐

衷墨集

翠樓吟 同槐廬粹父過聖安寺寺在東

湖柳林舊有金世宗章宗畫象

古松二株亦數百年物今並不

可得見惟叻指揮商喜畫壁猶

存光怪奪目王阮亭高念東諸

先生聖安僧舍聯句卽此地也

磬落風圓花飛晝寂東湖試尋初地興亡如

夢過算都付銅仙鉛淚詩心禪味任歷劫枯
桑流光飛轡閒僧睡有誰知得古懷今意

劇憶仙客當年擁翠牋斑管雅游同記奇觀
搜殿壁看龍象森嚴餘幾塵緣清未更覓徑
花分捫碑落碎傷憔悴暮濤吹卷碧雲天際

宴清都四月望日子石招飲花之寺

懽意隨春減闌干外惱人新綠都換番風次
第醑醺過了華年難絆依依占地持觴漫惆
悵尋春較晚試憑高認取春痕亂紅零落誰
管年年對酒傷春蘭成憔悴愁賦應嬾鶯

簾按拍鸞牋覓句舊游煙散休嫌絮影飄零
賴迷卻天涯望眼醉歸來鼓角嚴城輕陰乍
轉

長亭怨慢亭皋木葉下紛紛七見秋光
老蘓門多少天涯淪落意未
應秋士獨銷魂此已乖口占
句也容易秋風又逢搖落所
謂樹猶如此良可悲已用石
帚自製腔以寫懷抱

乍吹起秋心千疊寂寞亭皋試寒時節搖落

何堪庾郎離緒黯淒切客懷添否還認取星
星髮人老薊門秋枉盼斷飛鴻天末愁絕
對宮溝幾曲多恐怨紅飄沒尋詩舊徑省前
事暮鴉能說是春風萬綠成圍早陌上玉驄
嘶熱但極目長空冷翠淡煙明滅

綺羅香和李茅亭舍人雨後見月

雨斷雲流天空翳淨寂寞虛堂延佇望裏嬋
娟依約舊時眉嫵任高寒玉宇瓊樓休孤負
翠尊金縷算怨娥省識琴心冰絃塵掩向誰
譜流光彈指暗換猶記東塗西抹年時三

五斷夢迷煙贏得淒惶
箏語待放將一片空
明爲照徹萬家砧杵
問婆娑弄影花陰夜闌
吟倦否

慶清朝丁亥展重三日疇丈鶴老龍樹

寺補禊同拈此解

杏酪初分餉簫乍咽
良辰過到清明提壺勸
客幽尋小憩池亭漫說
湔裙人倦殘寒猶自
勒春醒番風悄倩誰
被取芳意恫惺屈指
十年往事只西山共我
記得鷗盟依依穉柳
嬌眼還向人青莫把
暗塵輕拂闌干怕有
舊

香凝歸來晚一尊花底聊遣愁醒

金縷曲六月三十日鶴公招同夔笙小

集市樓

落落塵巾岸數年光卅旬又六今宵剛半飽
餓誰憐臣朔死聊共侏儒一粲看眼底風花
凌亂酒釀茶甘銀鐙側料牽人不敵羊頭爛
容易遣隔河漢 杯行到手休辭嬾聽淒淒
蛩螿四壁秋聲偷換人外聊同文字飲藉作
障塵腰扇算蛤蠃尊前何限漫道不如公榮
者勝公榮也莫同杯琖歌一曲南山旰

高陽臺十刹海荷花爲都人銷夏勝處
近則畫船歌酒都入南湖喬木
蒼煙非復往時游事矣

翠葉招涼紅衣入漿灣頭銷夏年年柳外長
堤晴絲慣拂游韉王孫去後無簫鼓漫擎霄
喬木依然甚怱怱鶯燕天涯閒賸鷗眠曉
風吹覺華胥夢記排空金碧市地球鈿葉葉
花花是誰深護文鴛煙蘿一角西涯路想侵
堦綠皺落錢只紅樓飛翠參差掩映華天

蟲秋集

玉漏遲中秋雨中扶病視姬人抱賢拜

月

月和人意嬾風疏雨細助將淒惋小室吟湘
靜倚銅荷慵翦一樣良宵輕擲恁偏我賦情
難遣愁望遠浮雲知得素娥幽怨 依然瓜
果中庭問可似年時月明花絮愁病相看厭
說夜深絃管裊盡絲絲篆縷訴不盡深深深
願羅衷偃闌干露華淒泣

摸魚子酬沈鳳樓舍人並柬道希

卷疏簾新涼沁骨砭人都是秋氣蕉心先怯

西風勁經得雨憔悴君信未甚眼底空花
幻影堪描繪無端暗悔看蜷曲支離城榭社
櫟多少向榮意十年事珍重修鑿飾幌依
然驚到龙吠古人欺我真耶妄此意諒君能
會青鏡裏祇徑寸光明磨鍊酬知己長歌漫
倚試問訊城西停雲無恙一笑共謀醉

前調寒夜不寐率意倚聲得摸魚子後
半莫知詞之所以然也明日奮泉
倚是調見寄且徵和作因足成之
同聲之應有如是夫

耐殘更篝燈覓句寂寥誰是同調故人知我
纏緜意鏤玉裁冰相勞君莫笑算一度風花
一度傷懷抱長歌浩渺儘望遠低徊衝寒辛
苦休爲外人道 憐花瘦知否看花人老明
年春信還早輭紅日月銷磨易生怕林嘲壑
誚歸也好只畫裏煙巒無地供游釣餐霞自
飽便長揖青山爛炊白石夢穩嶺雲表

金縷曲贈懷堂被酒作

刺促胡爲者正撩人春寒似水箇儂如畫呢
影銀屏相並處何許香來蘭麝算風月今宵

無價寄語明朝當病酒尚書期請注尋芳假
渾不管長官罵 填膺熱血憑誰瀉只依稀
狂奴故態向人非假贏得嬋娟青眼在此外
更何求也任浪蘂閒花開謝笑脫岑牟搗羯
鼓和斜街更點聲聲打拚一醉盡三雅

湘月 壬辰四月粹父監倉招同子美駕

部看花法源寺登陶然亭子美有
詞紀游致感存沒其言危苦回憶
戊子秋粹父約疇丈於此爲延秋
之酌酒邊念往淒然於懷倚調奉

酬所謂於邑難爲聲也

對花無語算今年又負好春如海問訊疏鐘
怕喚起塵夢都無聊賴新綠初融遙青滄爽
暫遣煩襟灑閒亭語燕似憐春去誰貸何
止憔悴春人懷香空賦寂寞寒蘭莖買醉延
秋尙記得風雨停尊相待今月仍圓孤雲長
往此恨啼鵲解微茫鄰笛更堪淒咽煙外

摸魚子癸巳熟食雨中

倚疏櫺斜風吹雨庭堦直恁蕭散方春已是
情懷惡何況春如人倦春莫怨便添盡春潮

比似愁深淺簾櫳漫卷賸兩裊潛痕十年幽
恨無計訴歸燕 壺山路昨夜夢中親見棠
梨幾處開徧東風濺慣孤兒淚那更鴈行中
斷時聞上高兄計愁望眼認一抹平蕪冷落雙江岸
檐聲弄晚怕淅淅瀟瀟空牀臥聽容易鬢絲
換

疏影

秋雲易夕漸漏長人倦敲枕寒惻欲寄相思
夢冷薜蘿王昌嬾問消息壓殘金線渾無用
枉拋盡十年心力只西園淡月啼烏如伴夜

窗岑寂 猶記小憐初嫁那時正媚嫵紅萼
相憶一樣山眉淺畫輕顰總異春人標格淚
痕都是黃金鑄誰量取愛河寬窄怕殷勤訴
與菱花換了舊時顏色

校夢龕集

瑤華水仙

縈虛暈月佩冷搖煙幻楚雲千疊香銷粉印
妝鏡裏隱約眉黃新抹凌波步遠鎮凝想微
塵羅鞵問斷魂幽曲誰招竟夜玉笙吹徹
無言獨倚東風算紙帳梅痕堪並孤潔冰心

漫訴春思渺譜入琴絲愁絕峭寒禁慣夢不
到西園蜂蝶是幾時淨綠浮湘一棹水天清
闊

東風第一枝元夕雨中用梅谿韻同夢

湘作

膏潤銅街煙籠火樹春城輕颺更鼓暗塵愁
斂餘香俊約恐乖舊處銀毬飛迸漫吟想雲
開星聚耍彩光流照天衢散卻半空霏霧
風乍過管絃時度寒自忍綺羅倦侶伴人蜜
炬分光買春玉壺覓句閒門深閉任芳節陰

晴無據聽笑歸閒話鄰娃月共去年人去

解連環歌

謝嬾池閣鬪東風俊賞鳳鸞飄泊弄倩影裙
帶牽愁儘著意糾春桺絲嫌弱背立無言記
前度庭花驚落算年光爛錦付與隔牆笑語
依約 重扃鎖煙漠漠只多情夜月畱照紅
索悄不慣簾外輕寒數懽事橋東又總閒卻
有限餘香忍一任游蜂狂撲向黃昏繡牀倦
倚鬢蟬自掠

水龍吟梨花

是誰刻意裁冰要爭六出天葩麗華清月冷
玉容寂寞啼妝初試淡極成妍空中有色餘
花漫比儘千紅萬紫枝頭春鬧自占得青蕪
地 棖觸吟邊新恨絮飛時東闌閒倚芳心
一點微酸醞釀暗憐幽意夢也闌珊斷橋任
說暮雲無際只愁他風雨含情脈脈正重門
閉

醜奴兒慢南禪值社徵題其明湖問柳

圖按漁洋山人秋柳詩李兆

元牋云弔亡明而作趙國華

以爲紀明藩故宮人事見青
草堂集詞成示穎生謂曾見
舊家精華錄秋柳詩題下有
送寇白門南歸五字云出漁
洋手彙是又一說也

東風柳眼閒閱興亡多少儘搖漾鵲華秋色
暮暮朝朝擬託微波暗愁空遡白門潮幾回
眠起亭荒北渚夢冷南朝算只舊時闌干
水面親見魂銷更誰訪尊前翠裏畫外銀簫
莫話滄桑撩人風絮又倡條長歌欲和玉關

怨曲煙水迢迢

氏州第一和次珊約古微同作

何事干卿笙鳳喚起當歌對酒情抱舞扇畱
雲邊笳訴月淒絕榮華露草三五年時記舊
約房櫳深窈張緒風前秦宮花底負春多少
又試新聲鶯燕小話前事亂愁誰掃迷蝶
春心聞蟬客思甚夢醒人杳乍開簾驚見處
歌塵惹閒情絕倒玉笛從今定愁翻伊涼別
調

角招笳卿招集龍樹寺限調同賦

傍城路登臨歲歲年年酒抱慵
訴軟紅彌望處只有晚山眉翠如故
推排未去怕眼冷窺人鷗鷺不見
題詩舊主是前日杜鵑聲換新
來愁緒休負彩牋按拍烏紗倚醉
花外閒尊俎笑桃曾覓句轉首風
煙綠陰壇樹吟情浪苦聽梵落禪
天鐘鼓莫漫愁生日暮看天際正
輕陰涼蟾吐

掃花游曉雨初霽獨游葦灣迎涼
弄水

容與於荷香柳影閒風景依然
俯仰增慨不知境之移我情耶

抑各隨所遇爲欣戚也偶拈美
成雙調爲雲水問

柳陰翠合正玉鏡酣妝茜裳嬌舞浦蟬韻午
倚紋疏記得曳風前度漫惜孤游儘勝閒牀
臥雨淡容與賸一葉遡紅爲載愁去 塵影
頻自顧笑葛帔練單又盟鷗鷺舊香換否怕
迴颿颺麴錦機輕汗思與雲閒一晌畱人小
住耿無語望層樓鬧花深處

前調觀荷葦灣載菡萏數枝歸作清供
亦逃空谷者之足音也

綺霞散馥正午枕涼同綠窗人情佩環縹緲
映芸籤亂葉倚嬌宜笑漫障青羅倩影臨風
更好自吟繞柰白髮暗搔愁被花惱幽意
誰共道訝似水閒門朶雲還到點塵淨掃換
籌花醉客舊時懷抱夢入滄浪笛裏歌翻水
調畫屏小寫豐容玉蟾低照

極相思伏日銀灣曉望同夢窗韻

悄風低颺煙痕山翠小眉分悠然誰會涼生
短葛思渺孤雲節物春明殘夢裏俯官河
愁蕩吟魂蹋波兒女關心尙數笳鼓朝昏

醜奴兒夏日限調詠燕分韻得紅字

鬪春花底呢喃語記占香紅倩影翻空玉樹
休誇舞裏工石巢點拍傳殘處休訴金風
消息驚鴻玳瑁梁深睡正濃

黃昏簾幙微微雨可是春融王謝堂中何處
聞歌不懊儂閒情脈脈憑誰訴遮莫怱怱
潦倒隨風掠水還應惜老紅

念奴嬌叔問寄贈魏普泰二年法光造

象記文曰爲弟劉桃扶北征願
平安還時予季新亡讀之慘然

賦此以寄叔問去秋亦有鴿原
之痛也

深龕禮佛乍摩挲斷碣潛然欲涕大願入天
空記取憔悴看雲心事千劫難磨三生誰認
此恨何時已天親無著羨他塵外兄弟還
記客歲分襟秋心黯淡君灑鴿原淚爭信江
湖書尺到我亦飄搖如此佛也無靈天乎難
問散偈西風裏蒲團投老相期同證禪契

醉太平西湖隱山吾鄉巖洞最勝處薇
生侍御貽我韶石高廣不盈尺

六洞宛轉通明幽寫頗與相似

因名曰壺天意隱並系以詞

驚雲勢偏流霞態妍一壺嵐翠蒼然乍家山

眼前 湖天洞天南潛北潛山靈招隱年年

觸閒愁萬千

南潛北潛二洞名近隱山均在湖上隱山六洞一朝陽二夕陰

三南華四北牖五嘉蓮六白雀詳桂海虞衡志

浣谿沙夢得蓬萊七字定成此解

冷落騷詞楚調吟夢痕和淚漬羅襪

柱綠塵侵 苦恨垂楊遮望眼閒邀旅燕話

歸心蓬萊清淺客愁深

綠意蒹葭

涼生藻國正暮雲無際低映叢碧欲寄相思
洄遡爲勞商聲似助蕭瑟平生雅識江湖味
祇自惜客帆輕擲是幾番弄影迴塘短鬢晚
花爭白 風景鳧潭最好小篔坐聽雨吹上
涼魄斷鴈聲中秋色蒼然沈恨有誰禁得詩
人不盡離披感怕水墨圖成愁極乍眼明蓼
際疏紅點破半汀清寂

月華清己亥中秋

夜冷蛩疏天空鴈斷秋懷寂寂如許圓缺驚

心又是良辰輕負問今夕分外光明曾照得
幾家懽聚誰訴倚空尊倦憶廣寒儔侶漫
說霓裳舊譜歎老去纔知管絃淒楚默數華
年換了幾般幽素甚時遣似水閒愁都化作
半空飛霧凝佇正吟邊桂子暗飄香雨

一斛珠擬東山

鎖香簾箔酒腸不受牢愁縛舊時記共瓊枝
約拚負華年肯負鈿箏索夢痕散似風吹
穉懽情老作春雲薄空將醉眼閒中著裏手
低徊花底看人樂

惜秋華校夢龕社集詠鴈

萬里長風正高樓送目吟懷酣處斷影自憐
愁生楚天殘雨歸心暗落江湖向夢裏欣聽
柔艣相將又漁歌弄暝秋橫南浦 霜訊鎮
如許問驚寒昨夜有人知否怕歲晚盟未穩
舊鷗新鷺蒼茫水驛平沙乍恨牽玉關前度
誰訴付盧郎月中笛譜

暗香冬至逢雪問琴閣社集用白石韻

水天一色對玉龍舞處橫吹羌笛點點翠鈿
沁到梅心乍忺摘休說寒銷九九應凍醜飄

花吟筆算未若羔酒人家懽意競歌席 鄉
國路寂寂記醉蹋晚山冷翠飛積新絃自泣
潑水衾寒夢還憶知是東風醒未天淡入無
情愁碧料只有河畔柳岸容待得

三姝媚唐花和閨枝

春酣冰雪裏問誰催梢頭萬千紅紫占盡
華是年年三九玉梅花底芳訊潛通那更待
番風頻試惆悵宵來簾閣寒添蝶蜂蘇未
莫負斜街芳事記冷逼茸裘瘦筇閒倚點檢
珍叢黯吟懷愁入冬烘身世一霎續紛應悟

到枯榮彈指寂寞美人林下月寒照水

南潛集

浣谿沙泛舟珍珠橋側相傳爲南唐道

暑清涼山故道

一徑蒼煙蔓女蘿野塘新漲受風多閒亭無
處問紅羅 祇有碧山花外月似聞水殿夜
深歌斷雲如夢柰愁何

綠蓋舞風輕道暑元武湖用草窗韻

招得倦吟魂劫外湖山依然炫紈綺淒入秋
心閒鷗應笑客玉笛愁倚不定陰晴斷雲冷

浮空還繫漫低徊舊日風香嬌弄花藥波
底自認衰顏點鬢數驚塵襪穢慵洗一葉顰
秋滴羅襟賸有登臨殘淚晉豔吳香悄回首
興亡如寄黯無言目斷夕佳山氣

角招南來遇乙盦滬上瞻園金陵皆賦

此調見貽依調酬之

漫回首花閒一笑相逢且盡醇酎衫輕憐骨
瘦影入秋鐙殘夢非舊危闌佇久訝望裏雲
山如阜寂寞江湖載酒算牢落北征吟省杜
陵儂憊休負題瓊句就倚樓人健意外還

攜手涼蟾明似晝慣識狂奴放顛時候吳絲
解奏祇莫奏玉關楊柳共浥天涯淚裏怕今
夕玉繩低愁來又

倦尋芳同人社集瓣香樓俯仰今昔慨

然有作樓爲許奉新行河時奏
建祀文正忠襄二曾公

晚霞舊影喬木新祠幽勝如貺懷遠登高自
拂劔鐔吟望半壁東南磐石奠一家兄弟凌
煙上倚青尊話中興陳迹幾回惆悵 看檻
外斜陽煙柳腥染春愁淒抑相向一瓣香熏

目斷岳靈天上茶火風雲名士氣河山涕淚
平戎想悄無言撫危闌亂塵誰障

帝臺春廡圍補種新竹適竹醉日也紀

之以詞左麾同作

簾戶一色疏槐颺空碧好事朝來補得花閒
綠天雲隙自劬蒼落扶淺醉最難是令辰欣
值快安排冰簟閒聽碧玲風激 煙靄冪清
露滴乍硯北興遙集便餐秀從今慰調飢也
那用玉山珠寶他日成林恣琴嘯誰識荷鋤
舊時客祇莫遇中郎賞笛材亭側

念奴嬌 九月朔日宿徐州作

暮雲無際趁鴈風南下長懷如託戲馬臺荒
秋易老重九近來誰作豔想霜花圓窺月魄
濁酒慵斟酌故人不見誰知老子蕭索劇
憶當日髯翁羽衣吹笛坐對長洪落滿目河
山風景異贏得馬頭塵絡辦取明朝自支殘
醉臥聽車吟鐸登高何處持螯左手曾約

前調 雙溝早發三疊前韻

蕭蕭木葉是郵亭昨夜秋聲憑託瘦馬荒原
嘶未已野興牽人頻作酒冷塵衫夢回土鏗

身世何勞酌遙青一髮相從如慰離索 爭
信晴野桑麻年時滾滾天外長河落幻影如
煙誰復料萬事豆萁瓜絡餐玉方疏還丹術
祕歸買牛宮鐸邨醪應熟麴香風外依約

驀山谿九月六日清河舟次作

去年今日路入袁公浦歲月不參差又扁舟
柳陰重駐冥鴻蹤迹來去本無心笑期約是
誰監有信還如許 舉杯邀月聊復閒情訴
秋色滿長淮問明日酒醒何處孤雲落落爲
我作輕陰着青送隔江山似欲招人語

一落索舟夜聽雨

記得日湖新句無情嘲雨敲篷今夜不成眠
纔省識清吟苦 浙浙瀟瀟如訴欲停難住
鄰舟定有翦燈人還似我銷魂否

中興樂阻淺高郵道中書悶行篋未攜

譜律此依玉井詞填云用李德潤瓊瑤集體也

彎環帶水淺於溝艱難上峽輕舟朝朝暮暮
如望黃牛高城空指秦郵爲誰畱西風蕭瑟
檣竿錯雜水調鉤輈 半生梗泛笑難收無

心去住悠悠江湖流浪淹滯誰謀海天何日
盟秋任沈浮忘機萬里閒身依舊輸與沙鷗
長亭怨慢泊灣頭距揚州十里追悼辛

峰淒然有作

鎮惆悵霜寒日暮景物驚心亂愁誰訴老去
何堪倚風吹淚怨孤旅高城如畫曾是我看
雲處寂寞綠楊灣莫更送隔江津鼓凝佇
歎人天咫尺今夜夢魂通否烏啼月落祇倦
枕殘更頻數倘鴈影得並江湖早懽入鏡前
兒女又繫纜明朝愁問竹西波路

滿江紅潤州懷古

第一江山稱霸府東南雄據弔陳迹興亡滿
目斜陽草樹京口雲連天北極海門地扼濤
東注只金焦兩點亂流中青如故風拍拍
江聲怒秋黯黯嚴城暮看縱橫飛舶乘潮掀
舞天塹漫誇形勢好浪淘幾輩英雄去倚長
歌不盡古今愁和誰訴

漢宮春滬樓暝坐待叔問不至用夢窗

韻寄懷叔問近刻所箸比竹餘
音有楊柳枝詞極工因並賦之

愁入西樓正翹塵漲海秋闌明漪花前怕聽
怨笛翻譜瓊枝江南舊夢記當年思曼清姿
無那是懷人時候吳天冷雨霏霏喚起吟
邊殘醉說瀾分煙翠一箭帆移重揩劫餘淚
眼載酒休辭驛橋弄暝甚維舟今夜偏遲誰
遣得重雲如墨棲鴉萬點歸時

法曲獻仙音用夢窗韻

颺麴塵流鬧花風迫海月檐鐙齊上桃葉歌
情楊枝舞節粼粼玉尊翻浪悵一瞥飄鴻遠
縈簾翠雲冷淡相向倚西風暗驚閒夢人

不見何處錦箏送響對酒不辭中愁心一點
如春蕩舊曲瀟瀟憐吳孃老去羞唱問非花
非霧幾許煙迷秋帳

夜游宮夜雨秋鐙旅懷淒異三十年未

歷此境矣然清逸之致有足述
者譜此索漁公和

點滴空堦夜悄似楚客怨縈淒調酒醒回腸
蕩未了問今宵惜秋心誰攢到閒夢新來
少自料檢江湖初橐臥聽鄰雞報霜曉起挑
鐙短長吟愁暗繞

木蘭花慢秋登虎邱書寺壁

幾年幽夢裏算今日畫中來看杳靄蕩波輕
柔桂楫相與滌洞清齋梵鐘徐引愛入門嵐
翠接秋眉自采霜鬢酌水劒花寒沁行杯
徘徊短策頻偎殘刻賸幾萼落正愁起關干
秋光平攬暮色遙催蒼厓待題翠墨倚長風
誰拂亂雲開慵聽閒僧說與切前歌舞樓臺
古香慢同叔間步登靈巖遂至琴臺絕

頂用夢窗韻

蘚池粉冷蘭徑香畱愁滿吳圃暝入疏林一

角淡煙催暮筇外鴈程低笑飛趁輕身過羽
瞰滄波萬頃在眼老懷浣盡幽苦是舊館
名娃深處鐘磬僧房殘霸誰主步履沈沈落
葉響廊疑誤古意落蒼茫亂雲鎖盤空嶺路
賸巖花自漂墜半谿暗雨

掃花游 常州塗次感賦

峭寒漲落正斷岸平煙片帆風裊翦波徑小
看人家負郭市聲喧早回首吳峰鏡掩螺痕
縹緲轉孤棹悵川塗九迴如引愁繞 尊酒
誰共倒更嬾問蘭陵鬱金香好雅游換了對

谿雲濛白斷魂親到短笛休吹怕入山陽怨
調倦吟眺倚青篷冷凝茸帽

長亭怨慢臘月四日偶然作

幾絕倒先生歸計百甕黃齏費人料理落落
雲孤等閒舒卷定何意寒瓊青擁還約略兒
時味鷗鷺莫驚猜試認取盟書一紙 愁寄
問家山何處黯黯夕烽西起白頭吟望儘銷
得杜陵憔悴看倦羽已落江湖漫猶憶巢痕
雲倚只催換新聲未慣玉簫月底

御街行贈驛柳

輕盈不傍朱樓舞。古道禁風雨。不知畱眼爲誰青。似爾閱人良苦。東西南北馬嘶塵起。有恨常分取。天涯今日多歧路。莫引游驄誤。等閒已慣惹離愁。那更飛花飛絮。夕陽三尺鷓鴣啼上。此際誰憐汝。

半塘翁填詞凡七稟自刻者爲丙丁戊三稟
既又哀其已刻未刻諸集刪存百餘閱付余
寫定翁沒後一年余爲刊之廣州所謂半塘
定稟也然刊落泰甚翁所揮爲涕唾糠粃不
屑屑者世之人率踵汗奔喘望塵而趨之若
不及者也端居循省良不能忍而割舍輒刺
取裏墨蟲秋校夢龕南潛四集所雜者得五
十五闕排錄成帙其已墨版者不復種及昔
黃仲則與洪稚存論詩不合戲要之曰脫不
幸先稚存死吾稟經若刪定必乖吾旨趣矣

翁生平旨趣余不敢謂不知今之爲是刻也
其果不至於乖與否也則卒不敢自知願以
俟之世之知翁詞者丙午八月朱祖謀跋